

Hesus Mes a Traha Biña...

“Beibel ta aprobá uso di alkohòl. Apòstel Pablo a duna instrukshon pa bebe biña. Hesus mes a traha biña!” Ku frekuensia e argumentonan ei ta usá pa hustifiká e uso (i mal uso) di bebida alkohólíko.

Argumentonan asina ta konvensiente. Si apòstel Pablo a enkurashá e uso di alkohòl, i si Hesus a hasi un milager pa produsí biña fermentá, sigur Palabra di Dios ta aprobá di e uso di bebida alkohólíko, nan ta rasoná.

Di otro banda, algun hende ta konvensé ku e biña ku Hesus a traha na e fiesta di kasamentu i e biña usá pa e sena di Señor no por tabata fermentá. Segun nan, den tur dos kaso e biña tabata mas bien djus di wendruif. Ma e argumentonan ei ta ignorá e teksto bíbliko. Juan 2:1-12 ta indiká bon kla ku e biña ku Hesus a traha a smak asina bon ku hende a remarká riba esaki. No ta usual pa remarká riba smak di djus di wendruif. Segun 1 Korintionan 11:21, algun di esnan ku a bebe (di mas) e biña di sena di Señor tabata burachi. Djus di wendruif no ta hasi hende burachi. Pues, ta klaro ku e biña tabatin un contenido alkohólíko.

Maske e argumentonan ei ta kai kortiku, tòg **ta un kibokashon pa hustifiká e uso di alkohòl a base di e echu ku Hesus a traha biña i apòstel Pablo a enkurashá uso di biña.**

No ta un sekreto ku biña tabata un remedi usá komún den tempu antiguo. Debí ku Timoteo tabatin problema ku su organonan digestivo, Pablo a enkurash’é pa usa remedí, biña (1 Timoteo 5:23). Lukas 10:34 ta mensioná un otro kaso di e uso di biña na un forma medisinal, pa purifiká un herida.

Ma mas interesante ta e echu bon probá ku e biña antiguo tabata sumamente slap kompará ku e biña di awendia. Robert Stein a hasi un estudio di bebementu di biña den mundu antiguo. Kantidat di outor griegu a mensioná e méskla di biña i awa. E biña den era di Homer (síglo 8 B.C.) tabata 20 parti awa i 1 parti biña. Alexis a afirmá ku tabata 4 parti awa i 1 parti biña. Segun Hesiod (700 B.C.), Euenos i Ion, e meskla tabata 3 parti awa, 1 parti biña. Diocles i Anacreon (síglo 5 B.C.) a skirbi di 2 parti awa, 1 parti biña, mientras Aristophanes (445-385 B.C.) a laga sa ku biña tabata mas fuerte: 3 parti awa, 2 parti biña. Pliny (A.D. 23-79) a referí na biña komo 8 parti awa i 1 parti biña. Tin bes den mundu antiguo, e meskla tabata 1 parti awa ku 1 parti biña. Ma esei tabata konsiderá biña demasiado stèrki. Stein a haña ku pa averahe e biña antiguo tabata 3 òf 4 parti awa, i 1 parti biña. I kualke persona ku a bebe biña puru (sin awa) tabata konsiderá un hende no sivilisá, un pagano kompleto.

Si hende di antes tabata sa e contenido alkohólíko den bebida awendia, nan lo spanta; nan lo konsiderá nos un kultura totalmente pagano! Si bo a biba den era di Beibel, lo bo mester bebe 11 glas di biña pa haña mes tantu alkohòl ku bo ta haña den 1 kèlki awendia. Stein a bisa chistosamente: “Den otro palabra, ta pusibel pa bira burachi di biña bruhá ku 3 parti awa, ma e bebementu probabelmente lo afektá e blas di urina promé ku e ta afektá e selebre.”

I kiko di e biña ku Hesus a bebe ora El a introdusí e Sena di Señor? Segun Talmud (komentarionan hudiu) e biña di sena di Pasku mester tabata 3 parti awa i 1 parti biña. Sin duda, e biña ku Hesus a traha tabata mas òf ménos e mésun meskla.

Maske biña fermentá tabata usá den tempu di Beibel, maske apòstel Pablo a enkurashá Timoteo pa usa biña, maske Hesus mes a traha biña, ta obvio ku **e contenido di alkohòl den e biña di antaño tabata mucho ménos ku e biña di awendia.** Bèrdat, hopi hende no sa esei. Ma awor ku bo sa, no ta onesto pa hustifiká bo habito mas, skondiendo mas tras di e kapa ku Hesus mes a traha biña.